

開放文學－科幻寓言－蝸觸蠻三國爭地記 第十四回 倡革命車旁轟炸彈 考憲政海外遣星輶

蝸牛王由是卑禮厚幣，側席求賢。夢帝賚良弼曰傅負版【《爾雅》：傅負版。負版者，善負小蟲也】，築於蟻垤之旁。三往聘之。既至，與論當世之務，捫蝨而談，有旁若無人之概【《王猛傳》：桓溫入關，猛被褐而詣之，捫蝨而談當世之事，旁若無人】。蝸牛王大悅，遂立為上相。傅負版薦其友伊威為左相。蝸牛王命二大臣，出洋考察政治。有河豚者，亦革命黨也。性沈毒，嘗言：「革命若成，值得一死。」【《楓窗小牘》：東坡謂「食河豚值得一死。」】同黨中或贈以詩云：「忿腹若封豕，怒目猶吳蛙。」【梅堯臣詠河豚詩】蓋形容酷尚也。河豚陰伺二大臣上車之頃，伏於萋蒿【蘇東坡詩：萋蒿滿地蘆芽短，正是河豚欲上時】之際，以螢火丸【《神仙感遇傳》：劉子南從道士尹公受務成子螢火丸，辟疾疫百鬼諸毒】炸彈擲之。轟烈之聲，震天動地。二大臣俱受傷，幸醫治旋瘳。河豚死焉。

於是，變法之志愈堅，卒遣二大臣出洋，考察政治。歸而改紀其政，命黃蜂主外務大臣事務，唐郎監造東省鐵路。斥金蟬，而以金鱗【《養魚經》：石首魚，閩謂之金鱗】主東省礦務。以大學博士瓜望【《西陽雜俎》：何諷嘗於古書中發卷，規四寸，如環無端。以問道者。道者曰：「據仙經，蠹魚，三食神仙字，則化作此物，名曰瓜望。」因取古書閱之，數處蠹漏，尋義讀之，皆神仙字。諷歎服】鞠通【賈子《說林》：孫鳳有自鳴琴，人唱曲，則自相和，背有一孔若蛙者。一日，道士見之，出一小筒，倒黑藥少許，孔側即有一綠色蟲出，納之而去。自是，彈唱不復鳴矣。有博物者曰：「此名鞠通，喜食枯桐及古墨。」鳳始悟。竹筒中藥，乃黑屑也】為學務大臣，盡反烏鰂等之所為。女學士絡絲娘【《爾雅》：莎雞以六月振羽作聲，連夜紮紮不止，如紡絲之聲。今俗人謂之絡絲娘】創紡紗制布廠，馬頭娘【穆希文《蠶史》：世傳蠶乃馬化，故背負馬跡。蛻殼時，頭如馬。今人祭馬頭娘，名馬面菩薩其神也】創設繅絲廠。海濱有鮫人【《搜神記》：南海中有鮫人，水居如魚。不廢機織】，以新法制冰綃，各國咸爭購之。復有工藝大學博士吐鐵【《會稽志》：吐鐵，歲時銜以沙，沙黑似鐵，桃花時，吐鐵始盡】，創設煉鋼廠，而中國之戰艦軍器，無待外求。乃命海螭復海軍，廢彭齊，而以鐵甲將軍【《本草》：蛻螂，一叫鐵甲將軍】為陸軍大將。以杜父【《山堂肆考》：杜父魚，一名吐哺魚，似吹沙而大。俗呼主簿魚，蓋杜父訛為主簿也。又《漢書》：杜詩為南陽太守，民間歌之曰：「前有召父，後有杜母。」】為火司寇，頒行新律，盡去杜伯之苛法。杜父初為主簿，勤於政事，有吐哺握髮之風，民間有「漢有杜母，今有杜父」之歌，故特不次擢用之。

遂下詔，預備立憲。居無何，留學生楊師太【秋蟬之小而綠色聲疾者，俗稱都了。今南人呼為楊師太】卒業歸國，運動請開國會，上書請願者數萬人。乃宣佈開國會年限，國中歡聲雷動。由是，百廢俱舉，銳意維新，國勢有蒸蒸日上之機焉。正是：臥心嗜膽英雄志，勾踐當年式怒蛙。